

BAB IV

KESTABILAN KELUARGA

Setiap rumahtangga yang didirikan adalah bertujuan untuk mencipta satu corak hidup yang lebih progresif, aman dan tenteram. Suami isteri bertanggungjawab mewujudkan suasana bahagia dengan perasaan kasih sayang dan cinta mencintai di antara keduanya agar perkahwinan berkekalan.

Perkahwinan yang bahagia memperteguhkan perasaan dan boleh meyakinkan serta menjadi seseorang itu mampu menghadapi masalah hariannya dengan lebih berani, yakin dan berkesan di samping dapat membina kebahagiaan jiwa anak-anak dan kaum keluarga.

Kebahagiaan sesebuah rumahtangga adalah menjadi matlamat semua orang. Segala masalah yang timbul sama-sama diatasi untuk kebaikan bersama. Namun pada hakikatnya tidak dapat dinafikan terdapat kemungkinan terjadinya salah faham antara suami isteri. Adakalanya keadaan ini dapat diatasi sehingga hubungan suami isteri itu kembali seperti biasa dan adakalanya perbalahan itu berlarutan sehingga membawa kepada perceraian.

4.1 Perceraian

Konsep perceraian orang-orang Melayu dirujuk kepada agama Islam. Ini bererti di dalam Islam, walaupun perceraian dibenarkan tetapi tidak digalakkan. Perceraian ialah pembubaran ikatan perkahwinan sama ada ianya berupa tindakan peribadi pihak

suami (talaq, cerai/taklik) atau menceraikan isteri secara 'iwad (khulu) dan juga pembubaran melalui perintah mahkamah seperti fasakh, lian, ila' dan zhihar.

Talaq merupakan kuasa yang ditentukan oleh syarak bagi seorang suami untuk membubarkan ikatan perkahwinan. Namun demikian hak tersebut merupakan suatu langkah terakhir kerana ianya merupakan suatu perkara halal yang paling dibenci oleh Allah s.w.t.

Talaq pula dapat dibahagikan kepada talaq satu, dua dan tiga. Perceraian melalui talaq satu dan dua yang dilafazkan oleh suami, selepas habis iddahnya, kedua-dua pasangan tersebut boleh rujuk kembali. Tetapi jika perceraian talaq tiga berlaku, usaha untuk merujuk menjadi jauh dan adalah tidak mungkin jika pasangan tersebut ingin berkahwin semula. Wanita yang telah ditalaq tiga, jika masa iddahya sudah berakhir, bebas menikah dengan sesiapa sahaja yang ia kehendaki tetapi secara mutlak ia dilarang menikah kembali dengan bekas suaminya. Kecuali jika ia sudah menikah dengan orang lain dan kemudian bercerai lagi, barulah ia dibenarkan menikah kembali dengan bekas suaminya.

Iddah adalah waktu menunggu, lazimnya tiga bulan. Jika si isteri hamil, masa iddah itu berlangsung sehingga anaknya lahir. Seorang wanita yang diceraikan oleh suaminya masih tetap berhak sepenuhnya atas pemeliharaan dari suaminya dalam masa iddah. Si suami tetap sepenuhnya bertanggungjawab atas makanan, pakaian serta keperluan isterinya seperti mereka tidak bercerai.

Khulu' ialah perceraian melalui permohonan dari pihak isteri yang disertai dengan 'iwad. Menurut mazhab Shafie, hukum khulu' terbahagi kepada tiga:

- i. Harus jika pihak isteri membenci kelakuan suaminya atau akhlak dan sikap suaminya terhadap agama serta dia takut nanti tidak dapat menunaikan tanggungjawab terhadap suaminya. Dalam keadaan demikian, ia harus mengorbankan hartanya untuk membebaskan dirinya.
- ii. Harus jika kedua suami isteri bersetuju untuk khulu'.
- iii. Jika pihak suami mengugut memukulnya atau mengugut untuk membunuhnya atau enggan memberi nafkah supaya isteri memohon khulu'. Dalam keadaan begini talaq berlaku tetapi pihak suami tidak berhak mendapat 'iwad.

Isteri boleh juga meminta cerai daripada suami dengan cara fasakh. Antara alasan untuk memohon fasakh termasuklah tempat di mana beradanya suami tidak diketahui selama tempoh lebih dari satu tahun, suami tidak memberi nafkah selama 3 bulan, suami mati pucuk, gila dan suami yang sering menganiaya isteri.

Ila' ialah tindakan suami yang bersumpah tidak akan mencampuri isterinya dalam jangkamasa tertentu seperti 4 bulan dan sebagainya. Jangkamasa tersebut perlu ditunggu. Jika ia mencampuri isterinya sebelum cukup jangkamasa tersebut, ia diwajibkan membayar kifarah. Tetapi jika jangkamasa itu tamat, ia masih lagi belum mencampuri isterinya, ia diberikan pilihan sama ada membayar kifarah

dan kembali kepada isterinya atau mentalaqkan isterinya. Jika kedua-dua pilihan itu ditolak, Kadi berkuasa untuk menceraikan isterinya secara paksa.

Zhihar menurut hukum Islam ialah perbuatan menyamai anggota tubuh badan isteri dengan salah seorang muhrimnya seperti dengan ibunya atau adik-beradiknya. Perbuatan itu boleh menyebabkan terbatalnya sesuatu perkahwinan dan suami tersebut diharamkan meneruskan perhubungan sebagai suami isteri.

Li'an berlaku apabila suami menuduh atau mendapati isterinya berzina tetapi tidak mempunyai saksi-saksi lain kecuali dirinya sahaja. Li'an merupakan hak seorang isteri atau dengan kata lain seorang isteri mestilah melakukan li'an apabila diminta oleh suaminya.

Walaupun terdapat banyak cara-cara perceraian yang diperuntukkan oleh Islam, namun tidak digalakkan. Perdamaian antara suami isteri amat dianjurkan.

4.2 Perceraian Di Kota Setar


Perceraian merupakan satu gejala sosial yang tidak dapat dielakkan yang dimulakan akibat ketidaksefahaman antara suami isteri yang tidak dapat diselesaikan bahkan menimbulkan kebencian dan pertelagahan yang terus menerus antara suami isteri. Keadaan konflik seperti inilah yang selalunya mengakibatkan perceraian tidak dapat dielakkan.

Jadual 5: Statistik Kahwin Cerai Daerah Kota Setar

Tahun	Nikah	Cerai	%
1986	2,362	381	16.1
1987	1,380	165	12.0
1988	1,624	376	23.2
1989	1,753	284	22.0
1990	2,106	234	11.0

Sumber: Jabatan Agama Islam Negeri Kedah

Statistik di atas menunjukkan jumlah pernikahan dan perceraian di daerah Kota Setar yang telah didaftarkan di Jabatan Agama Islam Negeri Kedah.



Kadar perceraian di daerah Kota Setar adalah tidak statik. Pada tahun 1986 kadarnya 16.1% dan menurun pada tahun 1987 kepada 12.0%. Tetapi jumlahnya meningkat kembali pada tahun 1988 dan 1989 kepada 23.2% dan 22.0% masing-masing. Kemudiannya berkurangan kepada 11% pada tahun 1990.

Di kampung kajian, daripada 40 keluarga yang dikaji hanya terdapat 5 kes perceraian. Perceraian itu berlaku sama ada semasa muda wanita yang ditemui dan baru sahaja berlaku iaitu dalam jangka masa kurang dari 5 tahun. Tiga orang berkahwin kembali dengan pasangan barunya.

4.3 Faktor-Faktor Perceraian

Sebelum berlakunya perceraian, terlebih dahulu terjadinya konflik antara suami isteri yang melibatkan beberapa faktor penyebab. Kajian yang telah dibuat menunjukkan bahawa kebanyakan daripada kes-kes perceraian bukannya disebabkan oleh satu-satu faktor tertentu malah melibatkan rangkaian beberapa faktor yang tiap-tiap satunya mempunyai kaitan yang rapat antara satu sama lain. Antara faktor-faktor utama yang dapat dianggap sebagai punca-punca konflik dalam sesebuah rumahtangga ialah:-

1. Pengabaian nafkah dan tanggungjawab suami
2. Poligami
3. Cemburu
4. Ketiadaan Anak

Tanggungjawab suami ialah memberi yang cukup kepada isterinya di samping layanan yang baik, kasih sayang dan sebagainya. Pemberian nafkah yang tidak dapat memenuhi keperluan rumahtangga yang asas boleh menimbulkan konflik. Sebab-sebab yang memungkinkan perkara ini terjadi ialah sama ada suami tidak mampu atau malas bekerja untuk menampung keperluan rumahtangga. Ini merupakan suatu lumrah yang terjadi dalam masyarakat kampung atau luar bandar. Gejala ini menyebabkan pemberian nafkah yang sempurna adalah tidak mungkin sama sekali.

Konflik berlaku apabila suami gagal memenuhi permintaan isterinya yang bergantung harapan kepadanya. Pada peringkat awal perkahwinan, pasangan itu dapat hidup aman, tetapi apabila lahirnya anak-anak, perbelanjaan keluarga makin bertambah. Isteri akan mendesak suami melakukan perkara-perkara yang positif demi masa depan mereka. Jika suami tidak menerima saranan isterinya, biasanya pertengkaran dan perselisihan akan berlaku. Krisis tersebut akan berpanjangan selagi pihak suami tidak melakukan tanggungjawabnya.

Dalam satu kes yang didapati di Kampung Pengkalan Keriang si isteri menyatakan perkahwinannya hanya kekal 5 tahun sahaja dengan anak-anak seramai 3 orang. Di akhir-akhir perkahwinan mereka, pertengkaran sering berlaku apabila isteri menimbulkan masalah nafkah yang tidak mencukupi bagi menyara ketiga-tiga orang anak mereka yang masih kecil. Si isteri mendakwa suaminya malas bekerja dan suka berpelesenan dengan anak-anak muda yang masih bujang tanpa menghiraukan keadaan keluarganya. Akibat pergaduhan dan pertengkaran yang sering berlaku, mereka akhirnya berpisah.

Amalan poligami juga merupakan perkara yang penting ke arah menimbulkan konflik antara suami isteri. Islam membolehkan poligami dengan berdasarkan ayat al-Quran berikut:

"... maka kahwinilah beberapa perempuan yang kamu sukai; dua dan tiga dan empat, tetapi jika kamu takut bahawa kamu tidak akan berlaku adil, maka kahwinilah seorang sahaja..."

Al-Quran, Surau an-Nisa, Ayat: 3

Secara dasarnya, Islam membenarkan lelaki berkahwin sehingga 4 orang tetapi ia mestilah dapat menjamin kesejahteraan setiap pihak. Poligami dilarang jika suami tidak mampu menjamin kehidupan yang adil bagi semua isterinya.

Antara sebab-sebab yang biasa dikemukakan untuk berpoligami ialah yang berkait dengan nafsu lelaki, yang dihubungkan pula dengan kebajikan perempuan. Nafsu orang lelaki tidak terbatas sedangkan perempuan mempunyai banyak sebab persetubuhan tidak dapat dijalankan seperti masa haid dan nifas. Dalam keadaan tertentu pula, isteri kadang-kadang mengandung atau bersalin. Ini membebankan suami jika ia kebetulan mempunyai nafsu yang kuat.

Di kawasan kajian terdapat satu kes amalan poligami tetapi tidak kekal lama. Krisis berlaku sebaik sahaja si isteri mendapati suaminya berkahwin lain. Si isteri mendakwa suaminya berkahwin dengan wanita lain tanpa diketahui olehnya. Akibat itu si isteri merasa bimbang dirinya terancam. Pertengkaran sering berlaku sehingga membawa kepada berlakunya perceraian.

Dalam kes-kes poligami, perasaan yang sering dialami oleh isteri yang dimadukan ialah perasaan tidak puas hati terhadap layanan suami, terpaksa berkongsi kasih sayang dan nafkah dengan orang lain. Kedudukan rumahtangga menjadi tidak stabil, seterusnya menjadi kebencian pihak yang terlibat ditambah pula pandangan serong masyarakat terhadap isteri yang dimadukan hingga akhirnya membawa kepada perceraian.

Satu lagi pasangan yang melakukan poligami dapat bertahan sehingga hari ini, walaupun suaminya berkahwin dengan isteri muda secara sembunyi-sembunyi dan tanpa pengetahuannya. Pada mulanya isteri pertama tidak dapat menerima hakikat yang ia dimadukan. Pertengkaran sering juga berlaku tetapi tidaklah sehingga membawa kepada perceraian.

Rumahtangga itu kekal kerana isteri tua dapat menerima poligami. Jika ia bercerai dengan suaminya sudah tentu banyak masalah yang timbul kerana ia mempunyai 5 orang anak yang masih persekolah.

Namun begitu temubual dengan isteri kedua mendapati dirinya tidak dapat diterima sepenuhnya oleh ibubapa dan adik-beradik suaminya. Beliau sering dihina dan dikutuk dengan bermacam-macam tuduhan. Hubungan isteri muda dengan keluarga suaminya amat buruk sekali. Berkat kesabarannya mereka berjaya mengekalkan rumahtangga tersebut sehingga sekarang ini, sejak mereka berkahwin 4 tahun dahulu.

Setiap pasangan yang berumahtangga tidak dapat mengelakkan diri dari mengalami perasaan cemburu. Cemburu yang keterlaluan boleh membawa kepada berlakunya salah faham antara suami isteri. Perasaan cemburu ini akan lebih ketara dalam poligami. Si isteri akan merasa cemburu jika tidak mendapat layanan yang baik dari suami. Wanita itu akan menuntut haknya yang tidak dipenuhi oleh suaminya sehingga menimbulkan keretakan rumahtangga yang berakhir dengan perceraian.

Sesebuah rumahtangga yang dipengaruhi perasaan cemburu selalunya akan disertai oleh pertengkaran-pertengkaran antara suami isteri. Pergaduhan yang sering berlaku menyebabkan timbulnya perasaan benci dan hilang kepercayaan antara satu sama lain sehingga suami menjatuhkan talaq. Ada juga terdapat keadaan di mana isteri meminta cerai kerana tidak tahan dengan pergaduhan-pergaduhan yang sering berlaku.

Pengaruh orang-orang luar juga memainkan peranan penting yang menyebabkan runtuhnya rumahtangga. Pengaruh yang kuat datangnya dari kaum keluarga terdekat terutama ibubapa dan adik-beradiknya.

Faktor ketiadaan anak juga terlibat secara langsung dalam proses perceraian. Kelahiran anak dapat mengikat kasih sayang dan memperteguhkan keluarga. Dalam masyarakat kampung, dengan ramainya anak dapat menjadi ukuran keharmonian sesebuah rumahtangga. Anak lelaki dapat membantu bapanya manakala anak perempuan menolong ibu di rumah, menjaga adik-adik dan dan mengemas rumah.

Dalam masyarakat luar bandar, bilangan anak dalam setiap keluarga adalah ramai. Keluarga di Kampung Pengkalan Keriang mempunyai paling banyak anak seramai 4 hingga 6 orang. 18 keluarga mempunyai anak sebanyak itu, 15 keluarga lagi mempunyai anak di antara 1 hingga 3 orang dan selebihnya 5 keluarga mempunyai bilangan anak melebihi 7 orang.

Jadual 6: Bilangan Anak

Bilangan Anak	Bilangan Keluarga
7 ke atas	5
4 - 6	18
1 - 3	15

Di kampung kajian, terdapat 2 kes bercerai disebabkan tidak mempunyai anak. Anak memainkan peranan penting dalam menjalin hubungan yang baik antara suami isteri. Bagi pasangan yang mempunyai anak, mereka terpaksa membuat pertimbangan mengenai anak mereka sebelum membuat keputusan untuk bercerai. Keadaan sebaliknya berlaku apabila pasangan tersebut tidak mempunyai anak, jika berlaku perceraian antara keduanya, implikasinya hanya terjadi ke atas diri mereka sahaja dan tidak melibatkan orang lain.

Setiap rumahtangga yang baru didirikan memang mengidamkan kelahiran anak yang dapat menyerikan rumahtangga. Anak bakal menjadi penyambung zuriat kedua suami isteri di samping sebagai tempat pergantungan di hari tua. Sekiranya anak yang diangan-angankan itu tidak ada maka sudah tentu perasaan tidak puas hati antara satu sama

lain berlaku. Setelah berputus asa untuk memperoleh anak, maka pasangan tersebut memilih jalan untuk bercerai.

Terdapat 2 kes perceraian yang berlaku ke atas pasangan yang tidak mempunyai anak, walaupun telah 5 tahun berkahwin. Si isteri diceraikan setelah timbul ketidaksefahaman antara mereka lagi. Namun demikian, seorang responden yang bercerai lebih 3 tahun dengan suami pertamanya atas alasan tidak mempunyai anak akhirnya berkahwin lain.

Walaupun begitu alasan ketiadaan anak tidak boleh dijadikan alasan untuk bercerai. Jika ikatan kasih sayang antara suami isteri kukuh, masalah ketiadaan anak mungkin dapat diatasi dengan pengambilan anak angkat. Dua pasangan suami isteri yang tidak mempunyai anak setelah berkahwin hampir 6 tahun akhirnya mengambil anak angkat. Anak angkat itu dipelihara seperti anak sendiri dengan diberi kasih sayang dan belaian mesra.

Sebagai kesimpulannya dapatlah dikatakan bahawa perceraian dimulakan oleh konflik yang sering terjadi antara suami isteri sehingga menimbulkan pergaduhan antara keduanya. Jika hal ini tidak diatasi dan dibiarkan berterusan, perceraian boleh berlaku. Perceraian menyebabkan berakhirnya suatu perkahwinan berpecahnya satu keluarga.